





輕舟傍岸回宛見招提立萬竹環青蒼衆鳥爭棲集蕭蕭風雨  
來空濤響方急兵興樵采繁斤斧忽相及軒櫺失清陰幽徑愁  
出入夜靜蒼烟空時聞衆僧泣

施藏

思歸故里十吼

選一

蕭蕭無他營空閒成獨自麻鞋卽軟沙奚藉青童侍手引葛陂  
龍御風隨所至閒雲合四周流響皆蒼翠方欲尋寺鐘適與鳥  
相值去來總太空誰復知此意願挽日脚低且畱住平地

顧超

龍渚

紫海珠作宮方壺玉爲榜不有金鐵舟安能遂長往蛟龍走如  
絲雷電縑于蓋高掇翡翠巢俯舉珊瑚網馮夷仰面啼濡足不



敢上我欲呼巨靈玲瓏納諸掌

鍊墩

黃鶴委羽處雲浪高千尺聞說采香人時逢弄珠客磯頭燕麥  
青鷗背漁天白陰火然積砂迴風響秋碧一棹尚可浮三返殊  
未夕

張祐別業

寂寂巖前花香散春無奈當年作賦人遺宅生秋籟抱犢溪澗  
中尋僧水雲外天子不見收名交竟何賴畱得草青青相傳作  
書帶

鄭駙馬塚

南國錦織愁花草春如剪騷裏女蘿叢陰風落紅蘚非無十畝  
宮漸逐耕犁轉石馬嘶入潭金蠶不成繭夜半玉簫鳴煮蒿發

婁泫

王紫綬

潞河舟中

振衣謝京塵沿流理輕楫秋露淒以清舟子競利涉時徂景未  
晏蟲鳴林葉赤挂席下津門凌潮拾海月陰風激廣川澄瀾始  
晴夕感茲將母心早歲辭太液回首雙闕高千里如不隔山河  
亦已緬霜雪亦已迫綠酒頰朱顏白日凋華髮翹首望滄洲願  
言沿溟渤浩浩浮雲翔孤鳥烟際沒徙倚復誰陳杳然水天碧

山中夕雨

太行千萬峰昏旦狀非一衆瀑激陽崖層岑巒頽石支頤雨欲  
來峰峰鮮定色雪霽華景沉荒荒巖電匿絕頂滅復明微隙疎  
還密陰晴一何速泉鳴澗谷溢空翠生衣裳六月風瑟瑟耳目



亦已窮聲態詎能悉不知何山雲匍匐夕陽出岡巒虧蔽多反  
悔前峰失眷茲山中人有徑到芝朮詰朝雲起時攜手上翠崖  
易學實

述懷八首 選一

人孰無好惡利欲實移之天地有正性霜露各及時豺狼固當  
疾亦莫狎狐狸雷霆逐魍魎呼魑魍羽翼倘已成雷霆亦  
可危嗟嗟投有昊有昊方詭隨歎息漢三君未讀巷伯詩

黃子發歸清江

乾坤忽荒老洪流泛北陸岌岌石頭城戈矛飛萬軸繁華黯然  
銷誰能日夜哭獨有清江公挈家走川麓地緣一千里宵驅而  
晝伏中道閉嚴津城中故人屋倉黃三百指招魂暫棲宿盆雨  
夜連牀雞聲起相蹴夫何五月交頓兵盡敗軻夏漲亂橫流老

穉走南谷空腸蹶泥塗荒村丐糜粥汝翁上桂林捐軀悲汝叔  
白日瘦高原寒風動林木八載絕鄉關飄搖如轉軸靜夜轉中  
腸鄉愁可萬斛里舍蝕空梁里人半非夙三春墓田孤寂莫悲  
百六鄰人朝暮來聞子言歸速茲時正孟冬冬酒旨且熟菑畬  
近頗收方池散鴛鴦子行已舍此汝歸未可卜是邦倘可懷故  
人詩應讀

陸元泓

張梅莊山響齋

張子讀書屋四壁如空山援琴時一弄衆壑聲潺潺我欲往聽  
之一洗塵土顏其如孤鶴蹤飄然不可扳

汪森

曉經泰岱



晨興促征轡殘漏猶未終明星隱厓樹露草紛蒙茸岱色高巍  
峩盤互當其衝俄然映朝彩窈窕青芙蓉伊余適京邑驅策何  
匆匆疇昔慕登眺茲焉莫遊從實爲行役牽無由豁心胸前路  
莽空濶颯沓多悲風顧瞻若有失哀歌靡與同旅宿感夢寐身  
在烟霞中旋歸尚可及一覓秦時松

展墓作

出郭天氣晴裊裊楊柳陌人生無百年荏苒如行客久移江左  
居今始歸遺宅先壟展謁初墓道長荆棘所媿爲子孫能不加  
譴責少小在他鄉喪亂久離隔茲來得荷鉏荒穢一洗滌碑碣  
雖欹傾松檜猶蒼碧西林日已斜四顧無人跡酌酒哀痛淡燈  
火行向夕惆悵回輕車顧瞻重嘆息

吼懷

日月無停軌歲序俄侵尋秋風起中夜明月生高林美人隔千  
里無由慰我心思之不可見獨坐橫鳴琴別鵠調旣苦離鴻有  
哀音一曲猶未終白雲湘水淡

錢邦寅

雜詩

登高望八荒穹宇渺何極颼風催雙輪終古無停息中有玄冥  
機良非淺人測所嗟唐虞遠代謝何太亟英雄幾戰爭僅如燭  
火息睇此蠕動微勤劬謀一食知覺無虧全總爲造化域余非  
纖芥軀撫衷聊自飭弱草棲輕塵奄忽殊可盡保此方寸心千  
載常不蝕

人生有寓託所貴棲高明胡茲宴息區乃與幽都并夜冥晝亦  
晦七曜收光晶荆榛間篁篠蓊塞踰檐楹填填雷雨中復聞猿



狘鳴豈無因時人狎處如平生燥濕有殊性素稟安能更不  
幾眩瞽寧與桎梏攫非不羨狎舉恨乏雙翼輕

髫年學章句祇營梯榮私踰冠知遠圖始耽墳典奇歷攬要最  
理繁詞無足師先型有觀摩將爲經世資何期時數更遭變失  
所持匪不慕詭遇改度先自疑歸臥蓬蒿下鉏瓜固其宜

尚論簡陳編萬變無端倪倫物妍與醜紀載列鬚眉代遠陵谷  
遷往迹總隳夷奸雄固遺臭流芳亦何裨不見高原上殘塚徒  
纍纍生前坐華屋今知姓名誰所以達觀人曠世閱襟期茅土  
尚芻狗軒冕安足奇春巖草如翠秋泉清且漪對此斟濁醪翻  
笑昔賢癡

寄志晟家書

我本迂僻性素懷在滄洲苦乏藜藿資饑驅爲遠遊昨當楊花

飛別汝春江頭銜悲上渡船揮淚不能收須臾過瓜渚玉山已  
悠悠舍舟遵陸道驅車踰層丘杪春抵河朔作客殊矯揉傭書  
事本賤况非臭味投起居既偏側笑語徒喧啾懷抱鬱不舒積  
病乃纏繆衰老冀息肩荒涼無田疇念汝學未成愈增中心憂  
吾窮且勿論爲汝策前修人生具五官天賦原最優上則法賢  
聖次爲儒者儔古人惜分陰德業斯出尤厥職苟不盡何以異  
蟬蛸况今謀生術亦在詩書求制藝技雖小實爲青雲郵肄業  
貴精熟攻苦曷容媮時葩及古藻一一肆羅蒐臨文忌淺率務  
思挾其幽揣摩術誠工懷寶寧不讐然此希榮資尚非經術謀  
古今有至文班馬與韓歐六經麗日星窮源乃得流望洋弗研  
精終如贖兩眸汝當佔畢服努力空旁搜士人敦實學非此皆  
華浮尤須踐履功被服程與周汝有兩親在孝行理必由師友



及親黨敬信得無偷植基務仁慈以義爲鉏耨邪萌起卽雉庶  
免雜薰蕕但使行勿虧天爵誰能伴吾今去汝遠慮汝志不迨  
作此申訓誠定欲鼓愚柔佩服苟無敦永不叢訛訖念我羈異  
鄉心無一日畱謀歸斷不遠卜在黃花秋抵家覓團圓聊以釋  
離愁若冀沉憂開須汝成遠猷弓冶有付託乃可營菟裘勉旃  
復勉旃慎勿貽我羞

曹申吉

雨中登小閣隔江望黃鶴樓有懷

水國行多雨揭來值秋暮北風號晝夜脚躡漢口渡登臨愁白  
浪冥冥勞四顧隔岸眇危樓朱甍若烟霧古來耽名勝才盡崔  
顥句佳什至今傳仙人渺何處極眺但蒼蒼雲遮漢陽樹黃鶴  
爾飛來余欲凌江去

中秋用杜子美萬丈潭韻

晴景及良辰秋高破陰晦月乘峰頂出迴照荒城內淒淒暮氣  
清遙空辨青靄不異故鄉明始信天宇大南山曠萃律恰宐官  
閣對銀河遞隱見飛雪搖澹瀨桂叢紛蕩喬時露孤光碎涼侵  
飛鳥邊影射哀猿外蛩聲雜鼓角兔魄寒旌旆坐久分遐聽泉  
響通幽瀨誰識蠻荒境促剌來我輩客裏十中秋皎潔茲夕最  
悠然曠士心寧爲窮途礙且摹石鼎詩殊方紀佳會

時同武曾  
樓卷暨又

魯叔  
聯句

陰雨浹旬用高達夫苦雪韻四首

選一

官閣日寂寥由來儔侶寡青青園中蔬歲晚猶堪把鹿寒平野  
外午歸遠山下言念無衣人躑躅窮鄉者

春盡贈李武曾



今日春又盡吾歸竟何時積雨暗晨光  
茫茫遠山陂好身傍檐隙翩翩擇樹枝  
朱櫻覆左階綠荷冒前池濺珠不成圓  
結子行當離浮雲多聚散草木有榮衰  
中懷易慷慨形迹同拘羈豈復戀茗華  
感此日月馳素心澹以約遇物寧推移  
我欲奏齊謳子來續楚詞倡和誰復聞  
一遣殊方悲抗手招禽尚永結山中期

中秋月和蘇子瞻韻四首 選一

明月缺復圓弦影隨西東流光喜照人  
轉側浮雲中初見穿林樾漸覺依簾櫳  
乘高一以眺掩靄四山空故人隔河漢  
追賞知何從謂武曾也鎖院互朱棖傳是故  
王宮令名既不立零落同秋蟲我來偶憑  
弔誰信非天窮飛鴻在雲端歎息無由逢  
時家兄在燕應憐小兒女荒署自喁喁

九日集飲鄧元固齋中即事

客緒澹三秋勝遊愜九日僻巷經曲折  
遂造幽人室小窗含夕暉雲影紛蕩商  
尊疊延素心頓覺塵囂失坐久初月上  
霜晚樹陰密清歌響曲房妙質應難匹  
蕭疎三徑淡時時謀促邾何必東籬下  
頽然自稱逸宵分露漸涼天外鴻聲疾

代爰內贈

昔作大隄遊今年貴竹去良宵漏易稀  
遙恨雞啼處不怨馬蹄疾祇恐歸期誤  
蠻洞諸女兒那解齊人語

大龍澤雨中再用法鏡寺韻

松陰紛夾道聊慰遠行苦碣畱蒼蘚積  
寺憶甘泉道側甘泉寺舊趾寇忠愍南行所經紫薇冉冉明碧篠娟娟聚臥看北山雲  
去作東畦雨鳥語隔青冥時共邨烟吐  
驅犢傍籬落簑笠遙可數雷聲隱大澤  
峰影失亭午祇愁武陵路谿漲難復取



武陵雜詩用何大復韻

胡爲遠行邁  
茫然窮九州  
曠觀積水外  
大造良悠悠  
江濱饒估客  
牂牁亦通舟  
細競錐刀利  
淡揆龜鼉湫  
爾豈有王事  
終歲寬離憂  
舉世輕險阻  
我駕何當休

我思馬伏波  
壺頭困崔巍  
何如阮嗣宗  
途窮駕卽回  
迨迨五谿外  
羣峰蒼纍纍  
祝融司南紀  
草木凍不衰  
况復盛朱夏  
自覺涼風希  
遠行尚未達  
安能計遠歸

蕭條鼎澧間  
亂後行人稀  
茅屋遠巖下  
野水明荒陂  
新稻始成秧  
何以充客饑  
客子喜容和  
滿眼唯蒿藜  
遙澗收夕雨  
松枝供晚炊  
牀下伏雞豚  
門前畏虎羆  
展轉起中夜  
漏盡氣如絲  
不歷武谿險  
毒淫那得知

早發桃源過白馬渡抵桃川途中作用少陵早發射洪

縣南途中韻

荒邑乘夜發  
微涼庶能及  
小輿穿林樾  
侵曉嵐光入  
豁然昏霧開始辨  
諸峰立石磴  
鬱參差俯臨危  
棧澀路轉青冥高  
灘過白馬急古洞盤  
深窈窕疑有蛟  
龍蟄當年漁父棹  
重來空歎悒  
事遠碑記荒篠密  
狄鼠集徂暑戒  
修途佳致不遑挹  
鳴蟬遙幽咽如聞野猿泣

陳瑚

破龍澗

龍來澗水腥  
龍去澗波冷  
長松夾磬音  
明燈見幡影  
有僧導我入花木  
非人境  
論詩鬪槍旗  
月落燭兼秉  
妙音羣動息  
悠然發溪省  
微聞門外喧  
彌覺山中靜

憶昔二首 選一



長嘆亦何爲關山滿戎馬悠悠行路人無可與言者不知何年  
宮燒落鴛鴦瓦國殤千載魂夜哭楓林野哀鴻自南翔江水只  
東瀉荊州四戰地寥寥古人寡縱有隆中龍誰顧衡茅下

沈復曾

水南泛舟

伊人結高栖古陂薄城衍晴日亂鶯花池陰落層巘水竹不一  
方烟雲時在眼遙鐘林谷靜一樹櫻桃煖輕鯈跳飛沫詎識春  
流淺栝水切堂淡芥舟未爲福夕身下疎烟客衣落花滿

毛師柱

江行

寒潮響京口薄暮涼颼發孤榜凌層波江天眼空闊聯行見征  
雁遠向長天沒回首江南山殘陽映微月

蔡方炳

述先烈詩

有序 做班固泗水碑及韓昌黎體

先忠襄之殉闢難也當不可爲之勢而必爲處可以  
去之時而不去以一身支強敵以疲旅柱殘疆守全  
晉者凡二年守河干者四閱月守危城者三晝夜卒  
使孤臣血盡莫障狂瀾絕塞捐軀空隨箕尾高風大  
節長照耀宇宙間第恐音徽漸遠不能盡攷其生平  
爰是灑淚矢歌稍次歷官大畧冀覽者悲其遇而憐  
其心爾

神宗御宸極謨烈紹前王維十有四載先考實降生七歲志孔  
孟十三羅縹緗十八冠多士二十舉於鄉閉戶敦廉讓束身振  
頽綱所恥事干謁聖賢在羹牆公車屢困躓已未魁南宮筮仕  
得杭李郊原見稻芒維時歲苦饑中外起櫓槍廷議加三餉人  
情如沸羹先考有隱憂沉痛迫中腸敷陳真碩畫賴以濟安攘  
約係師餘姚社倉傲紫陽豈不顧越俎先憂時未康訟庭日就



閒虞芮爭質成縱囚復來歸詎曰畏桁楊仁心濡雨露勁節凌  
冰霜政成入啟事聲名動廟廊六載稱勞吏乃得春官郎素心  
樂晨夕官閒道愈彰朝端重門戶太阿歸貂璫虔劉到正士勢  
燄日縱橫立廟頌功德羣工效趨蹌先考義不屈持節出春明  
不忍隨世趨築室西山傍晚稻映籬綠山花浮石蒼奉母以終  
老豈復計行藏迨夫崇禎初乾綱弛復張功罪一朝定彈冠互  
相慶杖策入國門洪水正湯湯吳地久卑下溝洫成汪洋建議  
開瀏河疏滄乃有功立朝未三月秉鐸出西江一時譽髦士何  
止崔氏莊四真兼八則薦藜拔苞稂著有四真鞭影文心八則講學修鹿洞  
山川鬱青葱聖道賴薪傳勿令舊學荒時有屠阿丑弄兵湖泖  
中又有大海寇其名曰劉香聚眾恣剽劫殺人如屠羊守單戍  
更疲乍激皆傳烽乍浦激浦皆沿海地綏靖久弗奏謂非公莫當至則縛

渠魁不煩六師征交章頌頗牧拊髀慰先皇方擬寄節鉞遽罹

風木傷哀毀逾禮制廬櫬贊公房鼓聲起江北震動及淮揚機

畧上開府式廬至三商在野頻憂國東山望崢嶸服闋旋分陝

甘雨隨車翔真定半載不雨先考巡縣縣卽雨其名曰兵道雨新硯方煥發濺澤徧農

桑又值邊事急遼陽方用兵先考見推轂長驅日不遑鋒鏑被

原野鬪體蔽川陵寧前黑子地拒守屹金湯上功至樞部曰此

屬非常空函拂權要改調來山東齊魯兵未熄土寇復跳梁威

行惠並施半勦半歸降時平李青山之亂捐稅築城郭遠近頌治平捐泰

山香稅築泰安州城循資晉齊臬訟獄久不興知止須及時抗志托飛鴻

乞身竟不許分藩赴開封流氛日煽焰西北無堅城浩然一憑

堞吹笳散軍聲是時天赤旱田疇草不青二金易斗粟人肉舂

爲糧父子更相食道路無人行軍府下急牒催科太匆忙先考



淡哀盡檄下且緩徵抗疏以自劾鑄級分所應寇氛遂日劇決  
隄灌汴梁眾號至百萬直欲逼咸陽河汾界秦地雁門近盧龍  
四封通斥埃畿輔漸蝸蟾天子食不下寵命頒九重名對一晝

夜温顏天語長黃巾起中原黎庶無宿春使民不為盜務使衣  
食充名問靖寇方畧以使窮百姓有飯喫對劇土量肥瘠屯田計嗇豐元蠲起科

令乃得盈倉箱問屯田以承不起科對民頑由吏偷吏壞由已殃察吏先

自察夙夜秉恪恭問察吏以察吏須先自察對臣咨帝曰俞際會慶遭逢書

生感異數成敗鞠微躬朝辭夕即發驅車踰清漳細柳三千卒

直西設河防激人以忠義造士以端方創建三立祠以身繫準

繩幕繞凌霜戟人彎控月弓忽焉飛羽檄整旅當其衝設險徧

巖岫披荆立崇墉跋涉千百里勞瘁敢弗勝時帥師勤王奉旨畱守固關先考躬

屢設險驅馳千五百里之地不暇愛身命寧獨惜羸尪秋淡狡寇集扶病示

軍行先聲禡賊魄迴戈指西京朝議趣速戰潼關竟淪喪三秦

既瓦解蒲絳亦披猖長河似衣帶弱卒類轉蓬飛章頻告急舉

朝置若聾嗚呼秦晉民化為豺與狼問誰為賊驅門戶與篋筐

賊臨大慶渡奇謀挫前鋒倏忽河水合處處成津梁賊騎遂豕

突逼近我城隍畱兵守河上轉戰氣激昂平陽一報陷諸城踵

相望父老泣致詞疆圉半天潢此邦如不守勢已成建餅登陴

立信誓灑血染甲裳天子方宵旰輔臣領元戎親祖御樓前寵

遇盡一觴蕙懦不復進逍遙易水濱獨力支數月反謂公無能

臨危更易帥時事共倉茫將士遂解體兵氣愈不揚先考閱時

艱不以存易亡賊圍日以急守禦盡被創糧盡援又絕屢見封

空倉乘夜縋勇士擊賊中其肱掘土伏地礮發機如雷轟謀成

天不助方知國步凶先是城外暗伏地雷闖賊恰至其地急令人決機發礮闖賊適巡他營得不以先考



漢曰計將成而復失天也 況值颶風烈面黑日無光倉卒遺疏暫入紫荷

囊義士應時盛世號真龍驤下筆十萬字挽弓三石強壯志期

不就相依來危邦甘苦必與其死生必相將誓必從公死妻子

膏鋒鏃中軍應時盛向為遼諸生棄業從軍先考拔置標下見

先考草遺疏歸寓謂妻子曰城將破吾誓欲從都爺於

地下爾輩無為賊辱將妻妾暨十四齡子手刃之 賊梯如蟻附乘風焰益狂再拜辭北

闕授疏賈士璋藩封既失陷臣死安足償甲申二月初八日辰

再拜出遺疏贊畫知縣賈士璋 驅兵以巷戰流血滿中唐天地

亦為動豈特神鬼驚材官七十人密誓意誠良大義君知否母

辱千古名標下材官密誓劫先考出城先考曰吾封疆臣應死

封疆爾輩自去衆遂散惟中軍應時盛材官段可達

緊下馬問三立悲風何悠颺先考問三立書院應段二人挾從

隨所矣汝非朝廷命官可不死 收吾骸骨可也可達叩首避去 入門謁羣賢浩氣貫霓虹拜畢

卽南向自經先賢堂身輕覆以甲終古感國殤時盛亦捐軀不

數王鐵鎗死者四十六各各無怨恫文武將吏同死 誰為收骸

骨將士及編氓氣象尚巍然三日猶未僵衣冠捐佩玦橐葬在

東岡峻嶺摧梧檟淡林殘松篁憑弔動行路俎豆祀東庠千秋

萬歲下姓字名臣坊太原有名臣坊始宋張齊賢終先考共六十餘人 南都號建國忠

烈特表章建祠兼致祭時盛附其旁詔下崇褒卹賜謚以忠襄

宗伯顧公瑞屏上先考忠烈特謚忠襄建祠致祭時盛附祀焉 淵源繼絕學文成可頡頏文成

處其易先考命不臧本抱濟物性所至成慈航馳驅二十載終

莫振長纓世運濟否塞無以資勸嗟彼齷齪者議論徒雌黃

馬士英諸人猶以先考不守晉陽為罪 自同雞鶩食反欲譏鳳皇小子廢蓼莪日

夜空徬徨事久論始定道高名自昌誰鑿金石操錫我以琳琅

永茲哲人慕銜戢其敢忘

李 淦



西村觀穫

雞鳴起披衣圓月猶未落仰視晨星稀東瞻赤氣薄羣鳧爭喧  
呼淵魚或一躍展卷當斯時清風自廣漠靜與古人謀始見村  
居樂所思期不來興言感離索

涼生玉露滋宵淡萬籟寂夢醒聞蛩鳴聲聲催紡績伏枕塞羅  
帷明星看歷歷竊聽婦子歎夙負多煎迫葵菽嗟未充衣褐那  
從覓雖云租賦停庸調苦弗輟卒歲計難謀樂郊奚可適吾亦  
悲廩秋商歌自感激

邀諸友東園賞荷

侵曉集同志理棹向東臬纖雲蔽初日曲澹迴輕舸蓮亭款焉  
至朝露猶未消香氣襲衣袂清風隨飄飄更聞鸚鵡語見客如  
相招徘徊柳陰下盛暑忘煩歎既窮逶迤徑還周宛轉橋朱華  
間素蕊濃澹各自嬌幽人貪靜對賦景成揮毫夕陽帶虹影返  
照空天高沽酒恣斟酌野蔬兼山肴兒童折荷進碧筒勸豈勞  
散髮任箕踞畱連興會超緬懷河朔飲豈曰非人豪

乙卯初夏吳門喜晤曾青藜賦贈兼送之武林

老驥志千里伏櫪何足歎幸不負鹽車得以謝羈絆我友素同  
心渺渺隔河漢相去幾千程况復遭喪亂乞食走四方孤身出  
患難以此謀面艱吳市聚還散聞君遊虎林勞君湖上揆先人  
有棠陰飛鴻旣久斷堂構倘尚存翬飛須復旦子行何時歸余  
恐復他竄念子經濟才于今弄柔翰媿我乃駑駘奔馳徒放誕  
慷慨發悲歌壯心時拍案

陳軾

端州閱江樓



晨光見空澹襟帶烟景收江水自西來奔赴無停流沙內映華  
薄鶴鷁觸行舟掠水蕩紋錦唼草恣遊儵波懸雲氣曙澈長霞  
光浮近埵臨川聳遠峰積翠稠畫棟對明鏡長欄下滄洲麗日  
還澗瀆鮮飈弄寒漚階除鬱奇樹嘉蔭更環周修榦翳繁枝屈  
盤如潛蚪疑有風雨至飛舞卷潭湫簿牒乘餘暇閒曠資冥搜  
俯瞰足徜徉爽然自清幽

過大庾嶺

清氣迴瘴癘險道逼禽蹲地窮百粵盡岸拆兩江分衆厓斷復  
連匝匝披雲屯側行石齒中空響谷口喧落日照林莽窈然見  
前村疇昔思壯遊結綬鳴華軒屹謠媿桐鄉童叟時扳轅草木  
顏色改陵澤各變翻憑危眺餘暉寒色冷梅魂願言稅歸鞅長  
嘯息衡門

雜詩

選一

避寒愛洪燎畏暘宜清樾寒暘違其性造化亦荒忽叫呼自縣  
旌聲名悔題拂人倫無許邵玉石互伸曲伊優張虓闕斯臺並  
纓黻詩書既蹈籍翫髒及沉鬱所以南昌尉變名爲門卒

張茂稷

偶得

雨雪日兼夜寒氣充敝廬閉戶自無事一室居晏如跌坐觀我  
心澹然契空虛始知入靜境便可還皇初拙哉世間人求道于  
詩書

和陶歸園田詩

選二

晨興啟戶立濕霧暗前浦始知昨夜中此地有微雨鄰翁著屐  
來邀我過蔬圃笑指二三畦瓜豆青如許悠然坐樹根隨事相



與語不覺雲翳散已是日將午回首望天邊遠峰復堪數

### 東林寺

何處是東林蕭然蒼靄間莓苔歲月古薜荔顏色斑樹頭不出霧雲腳常在山石徑自由曲折藤杖多蹒跚遊蹤獲小憩感此空門閒

### 西林寺

虎溪橋邊路云是西林寺崩沙斷石隄敗草埋碑字宮殿何寂寥丘壑仍佳致送客杳無人一笑成往事急澗轉松風但有鐘聲至

### 楊森

#### 天樞弟夢斗送二十里至車輞惜別

欲別不能別送客送漸遠欲畱不得畱長途日將晚金鞭攀柳

條柳短不堪折生在大道傍柔條紛如雪行行至前路致問此何方古之送別地郵亭今已荒車輞復車輞轉斷征人腸  
淒切復淒切桃花萬點血飄落復飄落楊花滿天雪車馬何紛紛行人多於雲都是遠離者那得吾伴君君立大隄下我立大隄上大隄如屏風兩兩不相望

### 譚巖

#### 偕甯同魏山雨遊九郎墩

風雨照孤城山川結哀響不知帝子誰殿此一拳上荒垣圍古今百靈守幽敞土花自在綠竹子公然長老樹化爲人牽衣索紙鑑道士乞香錢文章伴魍魎細讀不全碑事已六朝往天子不足爲而戀一朝享峩峩古衣冠可以存吾黨長嘯倚暮天烟霞歸一掌



抄

秋浪破微風蒼茫櫛淡翠牛力于此終人力于此始既已居哀  
益敢復辭軒輊安得長竟天刻盡不平事

鈕

炎夏屯其膏我禾禿如萐野草爾何物朝芟暮已翠搜葉既亂  
真除根復忌器除之雖有時天方與匪類

犁

好雨喚春眠買鏡叫空谷驅牛曳烟水攪破一村綠饑鳥鳴  
前得毋驚影曲苟能善用之守此不材木

姚子莊

丙午生日歎

時將赴埭任作

生年歛半百胡為事遠征一官既卑小微祿奚代耕道路阻且

長而乃水上行養親親弗逮著書書弗成田園苦荒蕪廬舍雜  
兵丁况復隔萬里經歲信難憑憶我出門時老妻勤叮嚀勸母  
志仕宦訓子以成名祖父生我願未能至公卿我子乃碌碌焉  
得望飛騰中夜起悲歌神思屢變更髭髮鬢鬢白雙眸日以盲  
童僕鮮心膺驕情各性成糜錢費百千奚囊僅一篋所賴同心  
爰晨昏歌且賡謂姜子鐵夫黃壘聊共飽黑裘徒寡營開窗見新月  
淡秋天氣清河聲日洶湧乃更欲兼程迅速石頭下揚帆鳩茲  
城看山過九華青翠隨車生莅任未幾日簿書不暫停捐租并  
減罰此志宿昔盟媿無神仙術烹砂效子明理化媿幽獨何以  
慰生平

陸澆波

秋旅



秋雨連晨昏茅齋抱雙剝蔬瓜稀復長烟雲散還密蟲響貼孤  
牀江聲撼虛室先生嘯且歌閒手翻殘帙數酌竟陶然人與青  
山一野鳥故呼牛枕夢難畢喚童汲泉烹窗間試新筆澹泊  
趣有餘幽貞道終吉明發當辭歸千峰看曉日

林全復

長隄晚步

新秋成蕩滌風日澄巒林獨遊出寺口溪橋楊柳淡荏苒觀來  
復閒步移輕陰灩灩天露下俛首向蕭森

冒嘉穗

上巳脩禊水繪菴分賦

亭亭澗底松泠泠琴中鶴陟阿媚層厓激水映花萼嬋媛紅芳  
年纂歷青山郭惟恐鶻鳴春花坐零落

喬寅

登大悲閣

客愁來歲暮萬井生寒煙涼風昨夜雨遠樹皆蒼然歸鳥聚叢  
枝流水依平川行子獨飄泊悵望江湖邊

憂來

憂來無端倪命駕將安適空庭送客還耿耿秋燈夕蜻蛚牀下  
吟涼雨堦前滴

劉伶臺

酒人眇何處此地餘荒臺蕭蕭平野闊時有悲風來寓目非壯  
觀過者空徘徊乃知天壤間不朽因賢才古道留故轍往來安  
在哉修名苟不至千載同蒿萊

支硎中峰



倦客感佳辰翹首支硎路是時春向闌繁陰吐芳樹懷新行欲  
前延意復迴顧中峰鬱嵯峨松杉披宿霧游目萬象表俯視盡  
呈露吳苑雨餘青震澤波搖素漠漠野烟生點點輕鷗渡茲遊  
慰所思勝境誰能住臨風想幽人高隱栖何處

吳門畱別

歸舟維河干故人同至止悵然念離別寒月波上起山樓猶在  
望明日便千里亦欲臥巖扉飢驅豈得已倦眼待朝曦壯心逼  
暮齒愁緒如紛絲歷亂誰能理今宵有旨酒與君且歡喜

次溫陵

天寒白日速悲風鳴田間黽勉七朝夕始見溫陵山僮僕喜相  
慰病夫亦開顏停車入蕭寺心神曠以閒隱几移杉松殘照來  
禪關矯矯雲中宦海上何時還

洛陽江上作呈何用公明府

客久多苦辛山行殊不倦尤愛洛陽江長虹接芳甸潮落石嶙  
峴沙軟艸葱蒨寒臯亂峰聚春月泉聲變海風吹我衣始覺異  
鄉縣往聞豺虎屯此地荆榛遍我來得徘徊是時稍清晏烟火  
猶蕭條茅茨初營繕嗷嗷中澤鴻繹繹歸巢燕撫字賴循良窮  
黎荷深眷

桃溪田家

選三

複嶺隔人區百折穿危磴峰迴林壑開遂據桃溪勝平疇羅衆  
村雞犬遙相應雲嵐變朝昏風泉紛眺聽頃忘羈旅愁頗慰登  
臨興所異武陵源猶通車馬徑

溼雲歸巖阿朝烟澹茅屋遠田新水明昨夜春雨足村邨林鳥  
啼處處催布穀忽憶故園扉綠滿清溪曲何日釋羈愁開看飲



黃犢

插棘補疎籬  
憐香護芳樹  
晴嵐開曉風  
花光濕清露  
愁聞杜宇  
聲使我春欲暮

太湖晚望

日落太湖西  
月出太湖東  
水天含變態  
明滅青芙蓉  
漁舟歸別浦  
揚柳生微風  
遠火散春星  
隱隱菰蒲中  
歡遊已云暮  
幽人殊未逢  
曳杖向山寺  
煙際來疎鐘

淮村臥病

陰雲雜風沙  
廣野氣蕭瑟  
久病淹旅亭  
柴門愁出入  
邨荒藥餌稀  
所需百無一  
蒼蒼毛髮枯  
肌體都不實  
伏枕遠夢驚  
隱几百端集  
平生江海心  
惘然若遺失  
空將七尺軀  
日夜供愁疾

臧眉錫

古法濟寺憶勝道上人

寸雲起天邊  
知是幽人室  
車聲逐泉源  
杖履窮殘碣  
我來法濟遊  
萬山何奔越  
艸香不知名  
樹老烟霞揭  
憶昔勝上人  
祇林種薇蕨  
迄今伏虎巖  
衆峰俱飄忽  
日落何所思  
淡淡松際月

移居

卜居匪好勞  
所思在安宅  
先師垂遺訓  
抱此永朝夕  
嘉樹澹朝暉  
飛鳥受形役  
高賢今比鄰  
景止願促席  
俯仰在蒼冥  
晤言獨往昔  
末世競浮文  
醇理嗟分析

茗雪遶郭流  
臨流可賦詩  
葉落知秋晚  
役車將何之  
微風吹余袂  
寒月淡相思  
故人忘世俗  
晤對忽移時  
容齋尋吾樂  
恍然意在茲  
敝廬小天地  
斯言良不欺

高承埏



崇禎庚辰上巳偕同年諸子修禊海淀

義馭無停輪逝波焉可駐言尋佳節屆轉惜芳春暮緬昔蘭渚  
遊少長樂咸聚蕭散依林泉慷慨託毫素諸君跌宕士希風結  
遐慕濯流仍清漪蹇芳復高步觴來俯纖鱗曲終倚嘉樹遊情  
釋近鞅睇目眷遐寓修短匪殊途所貴適真趣各勉山水期於  
焉謝勞驚

題孤山正氣祠弔甲申以來兩浙殉難諸君子

自古有大忠一死振衰祚平生交諸公文質非一趣及乎同所  
歸百鍊無疑懼殺身不救國啣石獨東注湖上春水平山深暮  
煙度精靈若可呼悲風起高樹

徐善

五子詩 選二

高念祖佑記

遐哉竹林人蘭襟晝森灑忽散千金裝履齒半天下匏樽豁羈  
思亭臯秋繫馬相期白雲阿永謝悠悠者

沈馨聞蕙纒

長溪有奇士夙昔慕陵緬干春懷古意獨許秋雲見布素寧淄  
塵輕轡耻鄉縣但恐相逢時華髮驚已變

趙吉士

擬古

鸞鳩投枋榆鴻鵠翔冥漠分量相懸殊意志各有托橫琴修竹  
廬觀書亦崖畧因之念古人高風宛如昨俯仰多曠懷天地一  
郭廓

逝川無緩流風林渺靜枝歸鳥棲莫定游鱗時復疑驚望縱煙



駕山川發靜思欲乘扶搖翰寧同雞鶩悲濛汜暗相迫萬象自  
推移彭涓期未來仰見浮雲馳

泰安道中三首

選一

清曉度柴關雲石互爲一萬景含朝暎煙鬟淨逾碧仄嶺旣欽  
崎遠崖亦峭律瀑布濺虬柯猱攫擲拳栗伏軾未移時回首衆  
峰失落葉墮我懷秋林澹蕭瑟曾聞稷丘君黃冠古仙客安得  
從之游捫蘿探玉冊

過獻縣單家橋

經時苦積雨康莊殫爲河籬落骨荇藻舴艋走叢柯蛟龍出木  
末馬牛沒碾渦漁師收網罟乘輶拾蛤螺老農荷鋤泣織婦疲  
停梭冬寒且勿顧近秋已無禾縣吏持符至寧肯緩催科傷心  
江南客揮涕渡滹沱

丙午首夏雨過新嶺

行行近故山登躡亦已熟颯然涼風生空濛萬象伏猛雨成波  
濤倏忽滿陵谷本是山間行翻疑水次宿頃刻天宇開蒼黃觸  
我目此身已百盤猶在峰之麓崖崩半空嵌輿人偏投足峭壁  
絕飛禽嵐光遶石屋回顧攀捫處但見千章木積陰生夏寒炎  
景損蕭蕭猿鶴聞無言天籟發幽獨

劉謙吉

入關雜詩

選六

林壑迭映蔚川日互興沒揚帆渡孟津天吳靜不發凌人越清  
暉方舟列如笏褰裳就輕橈不知泥在鞮安流偃南崖談笑遂  
北突回頭顧我馬四蹄著大筏懷柔知百神六師皆豁達將軍  
愛釣魚起跳垂搯賤子陪河濱悠然見伊闕



放馬在華陰偶坐華山下每夜騎馬遲不遭將軍罵相對誇神  
峰指爪坼天罅晚霽懸僊掌翦甸溟陰瀉崖壑變氣候金天毛  
骨霸我欲登蓮花安得萬尺架材官搜封狐林薄分枕藉  
一馬馱三艷一馬裝二醜紛紛出潼關鞭箠隨其後家本秦州  
人椎髻縮長袖遭逢亂世間人命輕雞狗賊來不築城兵來不  
追寇只殺商與農閨婦皆授首雛兒拴細韁弱女登介冑阿姑  
抱懷中阿嫂出劉豆蒙耻越須臾天明不相邁至今麥積山人  
煙空井甃借問主將誰何以信斥候恣掠盡蒼生涕瞻忽衣透  
我請將軍矢先禁潼關走行路帶婦人殺之罪不宥  
代馬不戀南淮橘不過北秦筑弄西音吳歛傾東國況是長干  
人同作長安客相逢不飲酒出門無顏色天上箕與斗不盛漿  
與汁我有荷葉卮清光傍晚滴一人三百筒夢到巫山側荒丘

看綵雲雲雨隔朝夕延佇良已久涕泗盈曾臆  
生人非金石焉能長綺紵一見青春好再見紅顏換桃李嬌歲  
蕤芳蘭紛珠貫秋風西北來飄零不可玩精衛填滄海黃雀恐  
金彈美人贈琅玕報以青玉案豈無珊瑚管伸紙忽凌亂我欲  
乘雲鸞鷄鳴到日觀拍肩浮丘公回看灞陵岸  
人生不稱意怪說常八九昨日江魚來不道平安否只令星夜  
歸猶見倚門叟微祿亂方寸白雲依南斗此身在戎間那得能  
疾走踟躕鬢毛斑揮淚落兩肘

邵懷棠

紺池師雪中見訪分韻得鮮字白字各賦一首選一

寒園寡遊屐空庭生碧蘚沉值雨雪時幽懷難自遣紺師持杖  
鉢惠顧良非淺中厨少時蔬冬菁聊一剪苦茗滌煩襟披閱及



詩卷窮愁興已闌疎曠心仍褊何云同杜老索句慚乖舛

姜天樞

雜詩

沙鷗徹夜明林華和砧急幽思屢迴腸拂枕寒幃立開軒樹影移照空月光入豈知相憶淚落羅衫濕

東池別業

會稽數畝宅滿庭春草閒乘興出門去日夕杖藜還春筍澆新綠夏雨迷舊山知章湖一曲洪景廬半間共在風塵內悠然天地寬

彭桂

出宣州過箬嶺入歙州界遇雨

遊子倦行役攀折畏險阻宣歙盡山城峰巒互撐拄叢菁裹郡

縣仄澗跨垣堵茲嶺何岩巖懸道通一縷峭壁插天門裂石界地戶泉奔脚下雷風嘯空中虎朗日眩神魂旅人怯亭午況乎獨吾行縹緲入雲雨

甲辰入都路經奉符未暇禮岳丙午客林果菴太守郡

齋十月望日始獲登陟恭紀

恭聞青帝居凌雲渺洞府迺煥碧霞宮金鋪綴玉宇我來事攀躋出沒歷雲雨手引天門開飛身若霞舉神霄迴無形象緯逼可數蕩蕩懸青冥非此孰撐拄溟海納堂奧河汶繞庭戶憑空展曾懷浩然無疑阻颯沓長風吹飈忽浮雲去目中無埃氛安知今與古後來何紛紛登封六七主金泥閉石閭寂莫委榛莽於昭睠景貺豈不監下土功德滿山隅生民恆疾苦秩祀崇幣圭靈墟繁鐘鼓烝黎日阡危吾安叩帝所



金德嘉

古意

桃李春風開芙蓉初日照對君動君心何如妾年少年少君未  
知滅燭掩羅幃賤妾悲啼日平陽歌舞時牀前一步地苔深不  
可埽昨夜河漢明秋氣深宮早感此雙淚垂紅顏幾時好

舒大過飲江齋

鬱鬱園中花磷磷水底石秋風吹夕陽照此邂逅客草閣步徘徊  
佳期良不易矯首望青冥眷言懷曩昔悠悠千載間寂寥楊  
子宅圭組豈不榮毋乃爲形役以茲悟脩人動靜從所適俛聽  
寒螿聲仰視浮雲白清尊琥珀光且當共今夕

竹窗雜興

選五

田父急春作犁鋤夾廣路我生天地間悠悠何所務種麻不滿

丘種桑不成樹倉庚顧我鳴忽復舍我去好風江上來吹向芳

菲處薄言就東鄰橫經理章句

堂前何所有脩脩數竿竹黃鳥鳴樹間池塘春水綠俯仰有餘  
閒盤餐亦以足出門任所之日暮還來宿

舉俗謀其生徵逐一何苦我身獨蕭散所樂在環堵黽勉課兒  
童聊以當田圃更番侍壺榼村醪恣吾取酒酣步江臯悵望洞  
庭渚

梧桐當我門楊柳陰我屋攀條陟其巔可以眺川陸童子六七  
人種松兼種菊荷鉏薙草根門庭常肅肅

嬾性寡逢迎兼之抱疴久柴門晝不關一月無賓友移席卽濃  
陰孺子解趨走夜來螻蝻鳴螢火在窗牖四座悄無言遙遙看

北斗



杜門

暑日杜柴門癡兒抱我來問我何以然鎮月不一出北窗好高  
臥疎慵汝父質先民況有言動凶而靜吉耳目狗他人何時得  
閒逸薄俗慎交遊端人寡儔匹管鮑逝已久天涯總蕭瑟張耳  
陳餘輩其始則膠漆盟誓者誰子仰天欺曠日緬想結繩前愾  
此荆榛密俯仰念微躬所以擇斯術柱下與莊周二者必居一  
道無以客至

客至坐南窗淡柳鳴蟬變秋風昨夜來颼颼吹我面與子共鄉  
井結髮此游衍蹉跎踰壯齡茲意未終倦前月棹扁舟江空月  
如練訪古臨臯亭赤壁集諸彥悵望西山雲隔江時隱見人生  
固有懷豈得憂貧賤葛巾漉濁酒今夕且歡讌

汪徵遠

百憂前坐煉丹臺夜宿獅子林

捫蘿強先登險仄闢奇境巖嶂勢多端到此咸孤整靈秀開胸  
懷層雲蕩峰影陰陽私曉昏猿鳥競幽靜坐此悔從前各自有  
深省嘆息下古臺獅巖炯斜影結廬近絕壑光怪自褰領佛身  
積莓苔琉璃燈耿耿枯寂夜氣清塵囂盡知屏微雨開筠牕月  
色在諸嶺

晨發石鼓峰下散花塲

春岫漾晴雲游興激遐想歛展入朝烟風泉滿清響登臨愜縱  
覽翛然納虛朗俯瞰紛龍雷仰瞻列狝象嘹唳發山猿嘯聲動  
林莽回憶昨宵身高枕千峰上逡巡下飛嶠松門自靈徹髮雲  
散空華清嚴肅天仗於此信所如青冥引幽賞歸僧度巖巔還  
與烟霞往



由祥符寺至桃花源

屐齒澁荒苔扣衣越藜莽側身理層級仄徑勤俯仰古樹走鼯  
鼯陰崖嘯颺颺亂石激飛濤遙空落沉響蕭條山葉深一閣千  
峰上登臨憶昔遊白雲寒泚泚

入桃花源坐狎浪閣

精舍委叢藁棟宇半欹側積雨長莓苔不敢恣登陟入耳駭潭  
聲疑有蛟龍逼霧過松影青雲起山徑黑憑欄思轉幽衆響孤  
雲得誰復更誅茅旦晚還補葺太息下荒階飢僧無人色

已未冬日將還新安留別廣陵諸同學

朔風吹嚴寒天涯警遊子廬居遠行役涕泗紛難已猶記臘殘  
時含淚涉江水千里赴急難交情繫生死以高蒼巖夫子身後  
百憂煎勞瘁遑他委所愧心力綿艱難強爲理知己勝感恩寸

心念終始長日哭松楸逼歲還桑梓出門涕漣漣入門淚瀾瀾  
安得萱艸枝重榮北堂裏漫漫望白雲悲哉空陟屺

憔悴渡邗江殷勤藉良友相勗惇古懽餘懷寄卮酒岐路多筇  
徨蹉跎牛馬走風俗薄貧賤益益感故人厚葬日已愆期栝棖哭  
慈母清夜立空庭南望頻搔首揮涕向故交此誼長不朽

廣陵當要衝南北飛征蓋高軒賁草茅下交貽縞帶古道結綢  
繆契洽塵埃外頃令積陰天廓然收宿靄高懷曠古今始知交  
道大冷日掛征帆嚴霜下川瀨歸裝有餘榮羈人端倚賴

楊敏芳

甲辰九月庄中獲稻遇雨避橋西車逢喜田父招飲

九月禾登場農夫終南畝余亦田家子喜不望升斗晨興整褐  
衣努力先儕偶行途未及半驟雨漬衰柳棲身草屋中未嫌寡



窓牖野老自何來邂逅如親友問姓不及名相邀擁敝帚入門  
欣有托望林驚淵藪須臾羅酒漿自言孤村醜在昔植杖翁荷  
蓑亦云久誰謂咄嗟間雞黍招魯叟

喜孫豹人歸自江楚見過

人生非木石焉能久別離晨起看列宿三五東西移故人自遠  
來策杖過疎籬入門先大笑執手各爲辭不言別離苦但說匡  
廬竒洞庭饒霜露恍忽亦在茲言罷復長嘆相驚鬢已絲濁酒  
致足樂呼童斟酌之長此無相違百歲以爲期

感遇 選二

延年進女弟長門生青草君王有二心恩愛不終保嗶嗶草蟲  
鳴葉落華木稿人生一世間能得幾時好  
孤館人愁坐秋氣頗相侵寒蛩戀寂莫日久吐清音物華垂所

好哀樂各爲心哀樂終無極聊誦白頭吟

虹橋野望

野澗林容淡天高塞雁飛長虹垂秋渚落葉下漁磯伏檻一長  
眺憂來寸心違烟花無今古池臺有是非日暮笙歌歇游人猶  
未歸

黃朝美

元日聚族示子弟

人生重一本春氣回初陽晨興禮先靈子孫列成行春盤亦以  
設樽罍羅酒漿好鳥枝頭鳴寒梅吐春芳再拜飲三爵已足慰  
中腸如何後世人門內忍相戕

訪隱士

閒來訪隱士未面已開襟茉莉吐幽榭薜蘿垂荒林非無結交



者所貴是知音徙倚不能去清涼在桐陰

芙蓉庄秋集同丁漢公仙裳弟及諸子姪

秋發南園興扶携慰我心遠山自浮翠水氣動林陰汀蘭與岸  
芷物外愜幽尋觴詠彷彿蘭亭琴酒擬竹林道同理無隔境閒情  
自深翹首寥泐天哀鴻鳴遠音百年須與事爲樂宜及今

懷老友幽居

少小肆游從年髡各已侵故舊多乖離幽居誰窺臨允矣金石  
交不隔歲寒心未蕢黃公酒徒有稽生琴陋室餘簞瓢清言羅  
古今士貧亦其常歎仄覩胸襟時雨草木奮好鳥成歌吟絕愛  
屋東頭葵榴鬱濃陰再至眠匡牀瑤華當嗣音

黃時

芙蓉莊秋集

雨聲夜來急林樹風蕭蕭臥覺披短衣霽曉秋氣高出迎長者  
車行行出東郊舉目嘆所見田野皆蓬蒿一望遠山疊哀鴻正  
嗷嗷衰柳藏墟烟斷橋枕寒潮入門止丘隅竹響如怒濤石砌  
露花冷芙蓉何嬌嬈親朋旣咸集交錯飲醇醪搦管生遐思而  
無塵世囂飛騰志鸞鷲奚用賦鷦鷯天涯烽未息暮靄起亭臯  
登攬快襟抱駕言誠逍遙

吳苑

送汪栗亭歸里

年年共行役此日獨參差清霜十月重曉發沾鬚眉雁聲背淮  
水浮雲西南馳游子思故鄉胡爲在天涯  
天涯一尊酒各言別離難涼風懷夙昔眷戀衣裳單人情愛遠  
游豈暇傷饑寒子行我且止我歌子獨歎不如更斟酌共此今



夕歡攬衣瞻霄漢東方衆星殘

星殘有時明人別何日聚慷慨送君行行且復住脚躄立須  
更千里門前路撫瑟寫中懷悲絲亮難訴哀聲厲清響繚繞空  
庭樹一望盈盈水征帆從此渡征帆已如斯殘菊又溥露  
溥露彌蔓草不能耐朝光結交自總角不復知久長膠漆非一  
端中情詎可忘有道世罕見鳳凰鳴高岡嘗欲卜南村就子恣  
徜徉如何不暫緩先我戒嚴裝恨無雙羽翼凌空飛爾旁

顏光敏

張夏道中

山行頓忘疲曲棧穿蘿蔦下臨千丈巖沙嶼何娟妙桃李緣清  
溪疎花自相照日落蒼烟深餘香上寒嶠好鳥將雛飛游魚濺  
波越石梯絕攀援終古無弋釣武陵爭問津翻令達者誚車馬

常班班幾人展清眺

登太華山九首

千尺峽

自峪口逶迤行二十里抵青柯坪皆肩輿可達自此以上皆懸縵自汲峽口有石鐫曰迴心用戒登者

青柯圍翠屏四合無嵌竇東北窮石林劈空懸匹雷巉巖忽噴  
薄造化爭一候天矯轉蛇龍宵冥穿鼯鼯側聞天籟發曠野雷  
霆鬪仰井窺秋旻浮雲裊清晝白帝觴百神衆峰爲籩豆瓊臺  
阻且長翠葆紛何就

瀑布

卽玉井水流兩峰間昔年有巨石阻其口水泓深峰不可登

谿迴硤角轉三峰面始正萬仞青琅玕瀑流下砰訇天逼多烈  
風飄灑無時定細末隨霧消大珠如星迸石罅昔未闢渟泓絕  
人徑時挹霄漢芬遙想菡萏盛誰使鴻濛開瑤宮借涵映高蘿



有垂猿登歷當與併

### 犁溝

犁溝劃絕壁直上無迴藏能經復魚貫誰得相扶將危柯鼻撐  
拄脩綆垂毫芒仰睇愁瞑眩况乃窮入荒昔夢逐化人靈境空  
徬徨退身渺無地懦夫亦時強高林絕鳥雀萬壑聞笙簧便合  
此中住彌年承玉漿

### 白雲峰

在三峰北如几  
又北爲香爐峰

三峰信靈造巍巍司寇冠磊砢不盡洩蚴蟻復北盤結空出瑤  
几前對香爐寒大道望如髮豁然見長安我行採山蓀蔥蒨披  
岡巒秋色何時來萬里雙林丹三川富陳蹟入水無停瀾玉女  
悵不顧目斷雙青鸞

### 擦耳崖

振衣更難登詭狀乃非一蟻行緣危棧逡巡皆股栗側身常窺  
耳茹趾妨齧膝吹徑乾松花滴空熟崖蜜蕭滅無人踪坐惜幽  
芳失昔聞避世亂鷄犬喧雲日劫火燒咸秦遙慨人代畢遺竈  
尚可尋終當置蓬室

### 蒼龍嶺

紆迴下平坂削成當左衝青霄虹氣滅蛇螭垂蒼龍修鱗剝石  
蘚高脊突劒峰神物忽幻化雷雨愁相從玉京多欄楯琪樹無  
春冬咫尺不可接勞心益懍懍危巢見炊烟下界聞夕鐘相携  
戒前路日暮嗟霜濃

### 西峰

衆險歷已窮千盤墮幽渺西見青蓮花娟潔萬象表夕氣收秦  
川蜃市競紛擾漸覺明霞昏忽訝繁星繞何年採芝翁結廬出



林杪陰壑應天鷄空塔裂寒篠夢餘念疇昔纖末俱了了願從  
叔卿游自顧浮生小

南峰

侵晨望南峰峇堯更天半仰凌變寒溫俯視殊昏旦平岡始徐  
立亭亭步鶴鶴游塵失秦隴微縷求沔漢亂山互糾結豁然四  
奔竄欹傾如海濤決莽天爲岸驅馬過華陰豈謂窮壯觀徘徊  
俯清池濯纓復三歎

東峰

東峰不可極乃知造物尊屹然鼎彝峙勢如虎豹蹲松氣望蔚  
藍無人踐霜根匹靈拓太古高掌誰能捫晨光沒河漢似有雲  
車痕陰風折秋花吹落洗頭盆蜷局念鄉國久客傷精龜且復  
望虞淵散髮晞朝暾

游伊闕

羣山走嵩陽空翠疊遠天西南斷削壁中見虹霓懸高秋水痕  
落沙石何清妍游魚粲可數霞彩濯更鮮迴頭風雨交奔淙瀉  
鳴泉澄潭荇藻靜涼月生涓涓我來乘輕舸中夜凌紫烟紫烟  
渺無際凄然懷泗川

龍門已曛黑跼步凌幽峭夕風散輕陰飄忽見殘照冉冉行旅  
絕冥冥露鶴叫巖谷互響答似聽蘇門嘯浴城與印山延望空  
窅窅昔年盛歌鐘達人久憑弔金銀接梵宇墟落存餘燒有懷  
向誰論長歌下雲嶠

王北山邀同升六子綸飲西郊花下

久輟郊垆游因君驅我嬾望遠徒離憂爲歡欣得伴雖無巖壑  
奇出郊歛蕭散矯首聞喧囂始擬塵氛斷花林出層霄紆曲逢



池館繁英落繽紛細藥猶纂纂野曠天風柔雨蒸香氣暖花間  
饒蠓蠖游颺無停緩韶光逐物化何由得欸欸我昔泗水濱傾  
榼屢揮椀醉誦蘭亭詩狂歌笑迂誕栖遲金馬門野性迷町疇  
顧我壯心驚窺君鬢髮短趺坐空踟躕飛花墮衣滿

爲阮亭題庭前竹

昔在長干陌修竹接林莽把酒臨春風竟日迷來往寒翠浮客  
衣飄籜亂清響對此翻離憂欲濟恨川廣長安闢高齋隙地纔  
如掌美人來幾時忽見琅玕長西風吹庭戶海月漸東上邈然  
懷三山夙結鸞鶴想深叢通蛩音重露明珠網野人逝將歸誰  
與共幽賞

同曹升六郊行二首

八月歛炎熱半夜風雷驕城闔射朝霽水漲練溪橋空陂絕蟲  
魚風定淪漪消倒影看飛鴻歷歷排烟霄美人去荒江松桂不  
可要披襟坐修阪俯瞰蒼海潮駑馬行屢却終日鳴蕭蕭斯游  
悵難再何爲戀場苗

西山接蒼穹遠色同曖隳落日燒霞紅峰巒漸深黛萬壑積秋  
霖百里明素瀨行前陂隴高未覺村墟礙鬱鬱河橋柳分行疊  
旌旆秋色何匆匆颯然變關塞獵騎歸城隅蟲聲向天外與君  
歌楚辭千古同遙嘅

黃對

經沂州

驅車過淮泗蔽日沙與塵烈日圻黃土河水斷城闔老農爲我  
言旱魃終歲頻妻子伏溝渠少壯爲鬼燐旦夕道路間骨肉不  
能親忽聞鼓聲發給粟行深仁窮黎易見惠寒谷自生春寄語



當路者慎勿厭清貧

陸探朝

寄園詩

翠墟道人余友也余貧不能為園築室其地以竹籬間之日吟嘯其中遂樂而成詩

移家不住村朝市枕頭喧借得山翁地編籬稱寄園新桐不掩  
徑春筍慣當門軟土留麋跡青天落鳥言主人還作客同飯合  
盤殮拾菌沾香雨摘花浮瓦盆時時蔬圃上散髮看朝暾

盧生

盧生動忤俗自合掩柴關一室橫一榻琴聲若潺湲下鳥立平  
地綠雨生春山蓬髮弄水石時隨童僕閒小妻靜無語縫衣籬  
落間素產不足養恒飢多好顏貧居得道力處世甘冥頑

曹廣端

江氏雙節婦詩

白嶽多完節全名屬婦人芝泉應有本千古一長春三秋弔雙  
節凜凜寒氣侵明月來深夜清光共此心

胡獻徵

江氏雙節婦詩

狂瀾崩叔季節義恒多虧誰為保障功乃見江氏奇江氏有雙  
節日月同光輝著姓汪與程內則素所師當其為江婦容好正  
當時盟言金石堅舉案日齊眉裁成雙合歡要以白首期旻天  
胡不弔中道忽乖睽逝者不復還生者長相離豈無地下苦骨  
肉相追隨豈無墓上樹生為連理枝一有堂上親一有腹中兒  
大義不可從悲來徒自知皎皎明月光青青園中葵月光有時  
盈園葵甘自萎相隨以終老鬢髮今素絲韶華等埃塵但見雙



九馳

吳肅公

江氏雙節婦詩

節婦姓程為鶴誠先生元配  
姓汪即先生令姪鏡若妻

翩翩兩黃鵠飛飛共竹林  
先後喪其雄竹林無好音  
綢繆各有戶飲啄各有處  
哺雛毛羽豐奮迅橫四宇  
海水亦何深明月亦何皎  
兩兩冰雪心天地無終老

程起駟

江氏雙節婦詩

有序

余至廣陵見吾女計相別纔十數載雙鬢遽白獨幸  
子女成立更得孫與甥若而人登堂禮其姑姑亦極  
稱婦賢余既喜復悲憶吾婿歿且二十餘年矣  
因畱數語為甥相勉之時庚戌八月望日也

共姜矢靡慝淑姬卒歸鄗所遭惟不幸名德至今垂  
春秋二百餘年繼見更為誰風詩十五國爨倫賴獨持  
聖人特標出用以媿

鬚眉吾女影早單至性良不移家業既隕落戎馬歷顛危  
善事暮年姑亦復有佳兒以此報夫壻黃泉或有知還聞  
偕姪婦苦節兩相期無何十年間黑髮已如絲吾甥幸勉  
旃季偉真吾師

丁煒

詠史 選三

倉鼠有餘糧李斯發浩歎逐客歛見親功名非不爛  
結綬相羸秦詩書乃變亂緬彼沙丘行國鈞倚獨斷  
立亥易初心黨閹豈長笑恬毅功並推亡秦從此判  
法網既非疎天刑詎可逭悲哉上東門黃犬空遺憾

漢武志求賢公車競交薦作賦來相如談諧進曼倩  
煌煌廣川儒賢良策尤善道德姚姒窺源流洙泗行  
理實貫天人學豈獨災變苦無希世資江都獨遭譴  
置彼下帷功曲學乃成眷三復



繁露篇精深翼麟傳

龍性多變化誰云不可馴因時爲潛見進退自有神惜哉嵇中散好道喪其真守雌違老氏明哲愧詩人孫登嗤寡識阮籍異沉淪悠悠竹林下千載同悲辛

擬西北有高樓

高樓倚雲端美人結瑤室日宴未梳頭却坐理清瑟絃急聲何悲迴風慘白日不知樓外人流盼當軒疾未審曲中音徒矜塵外質玉貌有時緇知音那可得遲暮多感傷願紆獨反側

雜詩 選二

野人設檻蹄縛虎如縛鼠方其見縛時剖腹見肥羜殺身先後間相看何爾汝不見雲間龍夭矯自遐舉神變旣無方飛潛恣所處歛跡視危機債軫在平楚

上古結繩代其風何沕穆迨及書契興奸宄潛竄伏五刑濫秦觴六官脂莽復民命日迤邐咨嗟罪案牘吾欲愬蒼頡帝閽難匍匐願倚崆峒劍整斬南山竹簡策旣芟夸有鬼不夜爨

徐善長庶常過訪潞署賦贈

秋色落高槐空堂人吏散抱蜀寡歡娛索居起長歎君子攬德輝賁此凌風翰微言見冲襟清篇發淵玩持此樂新知深杯醕無算讌坐豈知疲疎星忽有爛預愁駕華輶明發悲獨旦

聞機杵聲有作

黑雲亂山低野店畱人住茅櫚荆作門樸質得其趣雜花撲几香兀坐愜幽素山月淒客心展轉若有慕軋軋起西鄰機聲隔林度誰家復相春辛勤警疲務無端兩物情倡和竟昏暮僮僕亦何知憎彼輒驚寤人生不耕織絲粒將焉措家稔與國豐熙



通日集卷五  
三  
皞由茲寓不見兵燹方編氓廢安作冷然夜色深寒風動草樹  
窗外列宿稀雞聲滿行路

書感

少無適俗姿誤有耽書癖蘭膏日夜焚輾轉費駒隙架乏禦寒  
衣釜少晨餐麥妻孥顧我愁高吟亦何益昨登故人門有客居  
上席百金裝鷓鴣千金買狐腋騎射超等倫談笑露肝鬲問知  
新督護南征隨破逆致身亦有階何必盡經籍咄哉魯諸生儒  
冠終被斥

汪洪度

與弟歸始信峰草堂作

龍門百尺桐泰山孤生竹刈取岳瀆材峰頭結茅屋雖未出人  
境幸已遠塵俗長看一老僧念我苦幽獨時把青蓮花松間來

其宿

古洞長陰森中有仙猿居身青鬚額白矍鑠千歲餘每當春暮  
時百花開山隅灑灑花上露采擷爲醍醐我來同飲啜美味天  
下無

伊昔寒江子振衣登此峰羣峭高插天顧盼抒心胷逝將謝人  
寰白首棲山中天傾地崩塌日月無光容殺身殉國難血灑衣  
裳紅名未垂青史氣已瀟蒼穹

邵吳遠

登孤山

孤巒數峯秀蒼茫佳氣積巉巖倚湖濱清波瀉危石林木鬱岩  
堯落照陰霞碧山靜梅蘚厚亭空雀羽瘠我懷處士廬縹緲何  
陳迹劒佩已蕭涼煙寒月共白陣雁迷迴峰新鴉渡黃陌叢篠



疑藏鬼文星時駕輓景越情屢侈興幽坐轉劇會當乘白雲飄  
飄凌霄赤

蚤春行

塔艸碧猶淺蘭條覆輕霧初起攬晨粧芳心怨朝雨游絲蕩空  
影啼鶯澁紅樹粉艷蜨衣香吹向羅幃度風剪曉寒生輕塵點  
幽路昨夜夢相思日歸未有期芳菲還自惜莫負艷陽時那更  
垂楊綠紅顏難久持

程 鼎

虎丘

一石自千古不知烟月生人行紅葉下鐘磬入林清空泉流鳴  
咽幽壑入秋聲曲徑筵茶竈画欄拂酒鐙遊人乘月出孤心別  
有情獨立高臺上空山蒼翠橫

王 雅

雜詩 廣陵客舍作  
選七

海水碧沈沈珊瑚鬱成林豈不在遙遠鐵網來相尋雕作鴛鴦  
枕價重雙南金朝熏酥合香夜覆葡萄衾寧知美人心倚寵驕  
莫倫素手把如意擊碎揚紅塵恩愛鮮克終歎息此異珍

奢淫爲禍媒節儉福迺敦道傍誰家兒服制何軒軒青驪瑪瑙  
鞍綺羅隨風翻商辛作玉杯麥秀盈宮門帝王尚未可庶士能  
久存

晨風依林樾遊子思故鄉故鄉渺不見煙樹浮天長江流迥且  
淡欲濟無津梁搔首久佇立淚落霑衣裳

故人已衰老無事客幽燕登車如昨日別離忽三年會面知何  
時寸心長憂煎對案不能飯夜中起復眠馳波赴大壑行雲思



暮山越鳥向日熙代馬立風前物各安所習君乃弗言旋  
黃鵠巢珠樹六翮生光輝適遇驚風起吹向淮南飛日昃方一  
餐中腸恆苦饑猶是千里才毛羽世間稀蓬蒿暫棲息衆雀莫  
相違  
白虹貫紫微羽檄分徵兵連營緣山岡烽火通夜明旌旗凍不  
翻霜寒鼓無聲將軍合銅符喧呼向東征曾聞舞干戚三月有  
苗平何必操戈矛威武毒羣生秦皇逞虎視阿房委榛荆好勝  
終蕩覆耀德垂令名

名士悅傾城篇爲任進士賦

選一

巫山何必夢洛川不足親誰家冶容女晦跡邗江濱粉香芙蓉  
面脂色櫻桃脣蜀葉垂鬟髮繡袂壓腰身不嫁汝南王安知石  
季倫願爲雙鴛鴦比翼戲清淪交頸誓白日歡慶無冬春

葉昌

贈別蔡靜子遠遊

怪君七年前訪我無一字今日柴桑間我識君子市遇合洵非  
偶所思愜素志衷曲何必論共說易堂事慙感交中懷憂喜成  
望企爲君謀稻梁掉頭不復計幡然理行裝惟我識此意鴻鵠  
不在天日月不在地丈夫七尺身艱危何足避守經固其常權  
或容有濟我久持此心豈受妻子累假令志弗騁視君真可媿

張穆

槎江旅夕

閒庭荒落餘歲或客斯地剝落人跡稀草木引羣類離離侵階  
除排闥一何肆暫託一日歡鄰里助揮置垂蘿戒勿剪蟋蟀或  
居笥歲晏節候催氣肅入衣被微吟愛新涼獨夜不可寐內觀



無繁懷萬象靜有致

詠懷 選一

羅浮有鐵橋上跨秋河影登此望東南下視三山竝瓊樓鬱崔  
嵬照耀滄浪冷真人相往還遺我金丹鼎謂可駐顏顏羽翮生  
俄頃九還若可爲舉世皆仙境

黃陽生

芙蓉莊秋集

選勝出南郭攬袂循江潯行行達平野曠望舒煩襟數折水邊  
路便入修竹林芙蓉倚曲沼啼鴻度高岑桂落似殘雪濤沸如  
鳴琴瞻字具雅望置酒坐幽尋才推三謝敏情喜諸荀淡持螯  
恣揮盞捉管隨狂吟晚圃聽農唱孤村看日沉陶然任歸去我  
欲眠秋陰

徐行

瀘溪崖居

削壁數千仞鱗鱗煙雨痕陰雲覆其上急水搖其根藤蘿穿石  
罅來往走蒼猿峭冷畱殘照溪光挾岸奔是誰好奇怪架屋以  
避喧密葉陰高樹不知何處門舟中一眺望肅然驚我魂

張憲

江氏雙節婦歌

珍木鮮悴枝醴泉無濁瀾節烈炳三辰徽音嗣二難高閔選良  
匹矢志金石堅歿者殉所事生者答所天願言撫弱雛荼毒罹  
百艱作法凜冰霜濟美相後先但知悲綆斷無意計薪傳淒然  
境上塵形影徒自憐堂上彈寡鶴堂下操孤鸞白日昏欲墮青  
燈夜雨寒啗彼列鬚眉何以負衣冠曷若青松枝亭亭直上天



錢 鈞

江氏雙節婦詩

高源無濁流貞樹無斜枝由來尚志義家法良可師江邨汜江  
水江水清且漪蕪城佳麗地雙節植不移髭髻詩竝矢黃鵠歌  
竝悲阿母偕猶媳宛轉自追隨髮亦何必斷面亦何必勢立孤  
誠大事忠孝原無奇子子長相倚冰雪幾差遲松柏青青在芝  
蘭已滿輝方今元氣散醇也化爲醜安得江氏婦永爲天下儀

項 睿

閩鄉鎮

流水一何急舟行疾如馬朝發浦城西夜宿閩山下山下有餘  
家誰是居停者磨礪鬪中堂饑狸翻舊瓦青燐照淡巷白骨堆  
原野相顧各驚心無復問杯罍平明揚帆行林鳥聲啞啞

陶汝鼎

春日客武陵逢職方廖鐘峯偕伯子遠心招遊枉山至

八方亭遇雨投宿毘盧閣曉霽復步龍潭塔院有作  
維舟看春山踏青青不斷全江弄一晴午樹新鶯亂柑酒發幽  
懷入林如始旦渡橋逢野雲冉冉邀飛觀松暝竹亦烟風雨來  
山半高閣閱峰陰身心澹層漢空香倒綠天溼衣霑璨璨投僧  
開素尊坐待雨光散吹旭落初鐘生雲變晨爨子規啼數聲谷  
曉山情換方潭照一龍古木晞雙鶴再上叢篁間氣清色已判  
山若戀茲遊故人桃花岸

秦年錫

和陶飲酒

選三

跼蹐怨天地大道安從得萬化在目前達觀去所惑蟲窮奉蛛



飽微物分通塞江山奕項劉何必大槐國五行多患傷至人寶淵嘿

懷情滅聞見靈蠢咸歸道榮名一中人徵逐不遑老非無赫赫譽外腴中或槁物理鮮並歡意愜卽爲好卿言亦自佳吾鼎猶知寶三復陶公篇人當了意表陳言不可讀汲古搜不經披函送冥天欣此一日成尋常理薄酌遠漏傳初更是時秋方嚴乾葉號空庭幽幽草根蟲哀響相和鳴我無汲汲思君母傷我情

繆振光

擬孟冬寒氣至

月寒霜夜落篝燈坐獨旦顧此合歡牀角枕爲誰粲去日如泉流來情豈雲散十行具一札臨紙手加盟表裏淨光明佐之錦

繡段雁飛不肯下無能借羽翰寸心千萬里恨恨起長嘆

八月十五夜和陶擬古

河山裂于瓦古壁猶獨完秋宇泛金波照我白衣冠畏日晝常伏對此聊舒顏空庭語孤影清風款閒關何處度歌聲嘹唳來林端石牀中夜冷素琴不復彈遙想飛仙人雲間鳴玉鸞安得步虛去從之入廣寒

侯其源

午夜起

中夜立溪月山鳥時一鳴登岡望遠阡烟樹如人行犬吠出邨急鬼火照岸明寂寥萬感集慷慨中難平童僕促我歸置酒列短檠靜淡思自永坐久神逾清疎燈耿明滅北斗時縱橫山川高下碧俯仰吾身輕



錢曾詩

秋懷詩

飛翰墜層雲潛鱗出重淵斯文良不苟言簡妙意傳傷廉與愆  
義雖愛必棄捐汲古退新懦耽思進重玄咀英落其實庶幾無  
媿焉

隙日射窗紙晨光正熹微秋衾護羈魄朝氣侵裳衣屏居絕榮  
慕此中甘息機無所謂今是何由知昨非攬鏡試一照敢云戰

勝肥

何延年  
歸雲奔舊壑倦身投故枝離情似楊柳一動棼如絲欲酌旗亭  
酒誰唱旗亭詩

片帆忽然來知君爲乘興片帆忽然去知君非興盡但聽潮汐  
聲比之雙鯉信

喜陸繡文中翰晚過寓樓  
晚鐘歸亂鴉暝色墮霜影堂僧皆放叅樓客獨止靜此時正憶  
君恰值君相省但得歲寒交頓忘遊況冷甕頭酒新餘窗間燭  
初秉良夜莫教虛坐聽更漏永

顧岱

擬古  
秋雲未爲薄炎涼從此起睚眦未爲怨報復竟未已俯傷千古  
間營營將安止張祿是何人知幾係終始淮陰袴下兒末局終  
如此鄧通無一錢二疏有故里我去從所安語君勿自苦

達士貴超曠至人尚冥濛乃知阮籍哭非爲真途窮山高可

五古



躡水澗澗可涉上帝紫微宮杳渺不可接塵界多飄風行矣慎  
舟楫莫羨鴻鵠高莫笑鶉鳩拙

蔡瑤

田居一首

霜落天氣涼木葉下籬樹鴻雁來何遲蟋蟀已在戶南畝新秫  
收糟牀滴夜宇遣兒呼比鄰開筵對場圃既醉起更勸壺觴不  
可數日沉河漢高星疎月華午明日酒醒時更覓東鄰父

泛舟

輕烟散蘆葦初日生長林漾舟綠水上舟小綠水淡孤雲渡谿  
來冉冉歸遙岑曠然天宇高遙波蕩空陰扣舷和漁父滄浪梟  
餘音意適日忽短倚棹空沉吟

邵長蘅

田居雜詩

選二

雞鳴披衣起驅犢向東菑土豹嗥溪巷寥寥人聲稀蔓草被修  
徑朝露漸我衣農務今正亟力耕戒乘時豈敢營溫飽庶免素  
餐譏

種瓠冀滿園種瓜冀滿丘夏月屏荒穢引蔓亦已修綠葉從風  
翻啾飈綠畛稠采掇敢自惜願充君子羞常恐迫霜節零落委  
寒疇

釋祖庭

對松詩

四十未聞道五十猶蹉跎焉知後所往不向愁中過念君歷歲  
寒星霜尚婆娑以此思前途感慨生愈多  
物役各有營人詎無寧止要以古人心會當尋終始譬如松上



風波濤安可擬卓哉斲輪子方之糟粕爾

釋本源

雜咏

蒼茫若上山杳冥不可攀獨有松與柏時送明月還照見山中  
人薄暮弄潺湲

釋弘智

秋堂晤止山指我赤面冠石三巘之勝遂爾西遊

別君忽七年只餘一雙屨血濺獨楓林草班五岳路旣洒釣臺  
淚喜得盤根處拔地石千仞同志共箕踞峰頂作易堂慎勿事  
章句聞此便奮肩直過秀嶺去但弄百原丸求人旦暮遇秋水  
起春風送我竹牌渡

送賡之師歸穀城山

選一

送師下鷺洲擊汰提耳語夾听青崔嵬亂山不可數帆檣分上  
下野鳥自飛舞千生一俯仰究竟誰爲主夫子還故鄉蕭然無  
寒暑期願享嬰兒且祝黃帝語事業但因應不必限門戶冰中  
有冰蠶火中有火鼠乘雲惟讓龍耕田勿駕虎各用其所長栽  
培若園圃嗣君負軼才發憤竊今古開花自結實時節感雷雨  
垣外老廢疾簞瓢挂一谷所云修上座可同破鑄煮

釋行導

憩煙山梅菴漫興

挂笠煙山下林深溪更深老梅勤竹屋石牀荷紙衾一身衣百  
結何敢付秋砧兀坐茅檐宗炙香復操琴離徽信指發不復問  
知音

釋嘗默



客有示試錄言闈中減解額之半者

玉不可療腹而遊於葱肆綃不可裁裾而賈於海市龍之生不羣鳳之下無二天地偶傾危至理適造次文章非要領汰者或其勢

釋詮脩

擬古

晝看山外雲夜看松間月起坐白雲中嘯聲動林樾偶攜斷口筐下山採薇蕨野花顏灼灼流泉鳴汨汨歸來眠竹床不知紅日沒

釋南潛

夢至梅里

時聞老母過梅里董庵

晨起意不憚夢斷吳天空極目西南角越山青幾重夏雲無意

緒堆作千萬峰遊子亂方寸躑躅將何從

小立青松根新夢聊自理恍惚梅里行孤村影寒水離親雪晴中鶯聲今復爾母子話溪堂斜陽射衣紫

老人命題扇影

危岫萬仞青羅立衆山小俯聽飛濤松下視穿雲鳥寒響發秋空微言落天表日暮坐忘歸欣看海霞曉

釋行哲

夢遊桃源

鷄犬白雲流曠懷秦漢世因之夢谿月照見桃花樹何人花下行長嘯驚我睡

釋性月

酌止山高司馬入山見貽



雲霾日月光抗節在草莽山川非昔觀怛然感塵埃有時懷孤  
松林壑每獨往余也卧石扉朝夕自偃仰微雨潤山椒野花開  
白壤忽回長者車索居慰悵快見君若大蘇顧余非小朗浩歌  
飛白雪披襟發清賞何時坐漁舟去理桃源槩

釋道白

夜抵廣信將登博山

朝發懷玉山暮投信州水舟泊已侵星孤燈水烟裏長虹如練  
帶寒月流不已靈峰刺眼來芙蓉迎面起顧盼事遐征清揚喜  
在此杖藜待明發浩歌懷彼美

吳城南園雜興

群峰媚夕霽微雨收孤城楊柳散晴霞參差郡郭明杖藜適自  
憇偃仰還獨行車馬日喧闐疇知幽賞情迢遞聞暮鐘歸途月

已生

渺渺具區口微微松江樹山郭雨忽來行人暗猶渡參差萬卉  
塵一沐清涼澍雲散月復升曉氣濕苔路寂寞坐孤燈聽鐘始  
一悟

釋大寧

山中雜詩

選三

竹門藤花開岑寂自幽適孤倚松上雲羣奔澗中石著我出世  
書刈我壠西麥悠然獨往情流泉亂阡陌落日生涼風天香拂  
枕席

天地自古有教化自古無勞彼憂患心立教分賢愚恐非蒼蒼  
意聖人何欺吾嗟吁不得已矯志尊唐虞婆娑石上松與我空  
躊躇



雲中白鳥飛草際青蟲擾鳥忽化爲蟲蟲亦化爲鳥問汝蟲鳥  
心蟲鳥都不曉吹噓風一聲隨風出雲表可憐造物心終古不  
能了

釋弘脩

立春日舟過廬峰精舍

彌月居城部長思歸草堂出郊纔十日寂寥坐竹房舉撓向前  
景謾謾溪風涼及來廬峰山巒壑遙相望隄柳發暗綠岸苔生  
晴光因遇結廬客同過薜荔牆自啟雙板扉敲石炊茶鑪出子  
青泥飯坐我雲根牀款客不知晚相送臨河梁我亦悵然別還  
同歸鳥翔依依戀色蕩舟趁夕陽

釋弘秀

秋日閒居

今朝秋氣佳叢桂花盡發林淡香益遠時至理自達所以貴韜  
精抗志厲清節孤鴻游冥冥兀矣謝羅弋  
卑棲三十年林園情日熟晨興理鉏罷時步幽溪曲長松有餘  
蔭秋草寒更綠日暮偶影還中懷澹無欲

釋大汕

祁門道中望黃山懷舊隱

曉發祁門行草樹煙霜生蓮華天際出松籟自然鳴陽巖誰結  
搆丹殿垂寒袖幽鳥不成吟飛泉冷石竇隱隱翠微雲還憶軒  
轅君何年升仙去丹灶草紛紛羣峰聳遠目按指三十六記得  
月明時一夜一峰宿

秋夜宿天門峰

潭水蕩空雲天門開石壁滿林風定時山山秋籟寂不知明月







